

Minister Angel Bermudez:

“Nunca Hulanda a para garantia pa Aruba”

MINISTER di Finanza, mr. Angel Bermudez ta di acuerdo cu e pensamento pa bay riba mercado mundial via Hulanda pa busca refinanciamiento di e debe di Aruba na un interes mas abou.

E pensamento aki cu a surgi na Aruba, kisas, e ta bisa, t'e motibo cu kier mira e presupuesto di Aruba bou di un vergrootglas. “E posibilidad ey t'ey y pa bisa berdad, mi tambe kier evalua e posibilidad di refinancia e debe di Aruba via e sistema aki,” el a duna di conoce.

Angel Bermudez a keda hura-menta sima pasa como Minister di Finanza, reemplasando Juan David Yrausquin kende a tuma su retiro como consecuencia di e hecho cu Gobernador di Aruba no a firma presupuesto 2014.

Bermudez den e programa Punto di Bista na Tele Aruba

diadomingo cu a pasa, a duna di conoce cu a base di leyman y Statuut di Reino, pa haci e refinanciamiento di e forma aki mester haya e aprobacion di Hulanda.

“Esaki t'asina, aunke Hulanda no ta para garantia. Desde Status Aparte te cu awor, cu mi sa, Hulanda no a para garantia pa ningun debe di Aruba y no a paga ni un depchi pa Aruba, manera cu el a haci pa Corsou y Sint Maarten na 2010 pagando 4 biyon florin.”

Angel Bermudez a splica cu e permiso cu Hulanda mester duna no ta nifica tampoco cu Hulanda lo para garantia pa Aruba.

“Loke ta pasa ta cu Hulanda ta considera e hecho cu nan tin cu duna permiso, dado momento mundo internacional lo mira nan como esun cu ta para garantia, cu pa regla y ley esey no

t'e caso.”

Bermudez a sigui splica cu si haya e refinanciamiento aki, e lo ta bon pasobra e interes ta core entre dos y 2.5 porciento, cu ta mitar di loke nos ta pagando ultimo añanan.

Si logra haya e prestamo aki pa refinancia un gran parti di e debenan cu tin, structuralmente ta logra baha e gastonan di interes.

E lo tin su efecto riba presupuesto pa yega na uno balansa.

Di otro banda mirando e situacion actual cu te ainda Gobernador Re-funjol no a firma e presupuesto 2014, ta pone pensa cu Gobierno di Hulanda kier “a finger in the pie”

apesar cu nan no ta responsabel pa ningun debe y cual actitud ta en pugna cu e status cu Aruba tin pa mas cu 25 aña caba den Reino.

Den e periodo aki ora cu Aruba tabatin mester di ayudo di experti-

cio of tecnico semper a bati na porta di instancianan concerni pero nada di sosten financiero, pasobra Aruba mes ta cumpli cu su debenan.

“Semper nos tabatin e mentalidad na Aruba cu nos mes por regla nos asuntonan y e ta un orguyo y motivacion pa mi yuda Aruba. Nos no por sinta bou palo y mira ken ta bin yuda nos. Especialmente den e temporada di crisis mundial aki cu tur hende tin su mesun problema.”

